

en leur village tout nuds, chantans alaigrement après auoir tout perdu au nostre, & est une fois arriué qu'un Canadien perdit (après toutes ses hardes) & sa femme, & ses enfans contre le sieur Du Pont Graué, lequel les luy rendit après volontairement & de fort bonne volonté, car il n'eust pas voulu se charger d'un tel attirail, qui luy eust apporté plus de peine que de profit, & neantmoins, il estoit en luy de les retenir sans que le Sauvage l'eut pû trouuer mauuais.

Les hommes ne s'adonnent pas seulement au ieu des ioncs nommé *Aescara*, qui sont trois ou quatre cens petits ioncs blancs, également coupez de la grandeur d'un pied ou enuiron, mais aussi à plusieurs autres fortes de ieu, comme de prendre une grande escuelle de bois, & dans || icelle auoir cinq ou six noyaux 257 ou petites boulettes un peu plattes de la grosseur du bout du petit doigt & peintes de noir d'un costé & blanche * ou iaune * de l'autre, & estans tous assis à terre en rond, à leur accoustumée, prennent tour à tour selon qu'il eschet, ceste escuelle avec les deux mains qu'ils esleuent un peu de terre, & à mesme temps l'y reposent & frappent un peu rudement, de sorte que ces boulettes se remuans, ils voyent comme au ieu des dez de quel costé elles se reposent & si elles sont pour eux ou non, & pendant que celuy qui tient l'escuelle la frappe & regarde à son ieu, il dit continuellement & sans intermission, *Tet, Tet, Tet, Tet*, pensant que cela excite & fait bon ieu pour luy; encor que cela ne fert que d'un amusement, plus tolerable que les choleres de nos ioüeurs de cartes & de dez, qui s'emporent à leurs premieres passions.